



Uunga siunnersuut: Suliffeqarfiit innuttaasunik tapersersortarialinnik suliffissaqartitsisut nalunaarsugaasut pillugit Inatsisartut inatsisaat nr. xx, xx. xxx 2019-imeersoq.

(Inuussutissarsiornermut Nukissiuuteqarnermut Ilisimatusarnermullu Naalakkersuisoq)

(Siullermeerneqarnera)

Demokraatit siunnersuummut imatut oqaasissaqarput.

Demokraatit sammisap siusinnerusukkut eqqartorneqarnerani oqariartuutigisimavaat suliffeqarfiit innuttaasunik tapersersortarialinnik suliffissaqartitsisunut eqqarsaatersuut pissanganartuummat.

Suliffeqarfiit innuttaasunik tapersersortarialinnik suliffissaqartitsisut pingaarnertut anguniakkatut ilisarnaatigivaat inooqatigiinnermi siuarsaanissamik siunertaqarnerat, soorlu sinneqartoorutitik innunut ajornartorsiortunut, kultuurimut, avatagiisinut, peqqinnissamullu atorneratigut.

Suliffeqarfiit innuttaasunik tapersersortarialinnik suliffissaqartitsisut niuertorpalaartumik iliuuseqarlutik sinneqartooruteqarniarsarisarput.

Suliffeqarfiit innuttaasunik tapersersortarialinnik suliffissaqartitsisut suliffeqarfiunngillat nutaajusut.

Suliffeqarfiit ukiorpassuarni ilisimaneqarsimapput nunanilu allani assersuuffigisartakkatsinni suliffeqarfinnut taamaattunut inooqatigiinni aaqqiinissamik siunertalinnut inatsisiliortaqaartarsimalluni.

Suliffeqarfiit innuttaasunik tapersersortarialinnik suliffissaqartitsisutut nalunaarsorneqarneq ussassaarutaalluarsinnaavoq, innuttaasummi suliffik tapersersorneratigut inuiaqatigiinnut ajunngitsumik iliorlutik misigissammata. Tamannami suliffeqarfiit innuttaasunik tapersersortarialinnik suliffissaqartitsisut suliffeqarfinnut allanut unammillersinnaaneranut iluaqataassammat.

Taamaammat suliffeqarfinnut taamak ittunut erseqqarsissunik malittarisassanik peqarnissaq pisariaqarluinnarpoq, soorlu kikkut piginnittuusinnaaneranut piginnittullu qanoq annertutigisumik sinneqartoorutitik imminut tunisisinnaaneranut tunngasunik. Saniatigullu sinneqartoorutitik aningaasaleeqqinnissamut il. il. malittarisassanik peqarnissaq pisariaqarluni.

Demokraatit siunnersuutip imarisaanut soorlu kikkut piginnittuusinnaaneranut malittarisassaqaqarnissaanut isumaqataapput – uani pisortat suliffeqarfinnut taamak ittunik piginnittoqataasinnaannginneranut, tamanna suliffeqarfiutilinnut namminersortunut pissusissamisuunngitsumik unammillernartuliisinnaammat, aammattaarlu sinneqartoorutip piginneqataasunut qanoq annertutigissanersoq.



Demokraatit suliffeqarfiit innuttaasunik tapersortarialinnik suliffissaqartitsisut pissanganartutut isigaat, taakkumi inuinnarnut ataasiakkaanut inunnullu eqimattanut atugassarititaasunik, avatagiisinullu atugassarititaasunut pitsanngorsaaqataasinnammata. Kikkunnut qanorlu suliffeqarfinniit sinneqartoorutit atorineqassanersut, taakkua akisussaaffii suujunnaartittoorneqassanngippata erseqqarissunik malittarisassassanik peqarnissaq pingaaruteqarpoq.

Taamatut oqaaseqarluta siunnerssut ataatsimiititaliamut eqqortumut sammineqarnissaanut ingerlateqqipparput, Demokraatinit siunnersuummut isumaqataangaluarluta.